

TESADONICA YACNOCQUIDON ISTE II

Pabadon tauamboen chiaid

1 ^{1,2}Pabado nebi. Tesadonica yacnocquido Nuquin Papabēdta Nuquin Ico Esus tantiaquido mibi chuioaquin dada uaimbi. —Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbanobēdtan Timoteyon: —Nuquin Papan adopashun —quequimbidi mibi tantiec.

Nuquin Papan Esusbēdtan matses cuidte chiaid

³—Esus tantiaquidēn: “Aden naic mibi bēdamboshē iquec, Papa,” quequin Nuquin Papa chianequid —quequin tantiaquin mibi Nuquin Papa chianembi naden. —“Esus bēdiactsēc tantiatsēcboedombi nēbi Esus tantiabededosh,” quiosh, Papa. “Adecbidi bēdiactsēc tantianamboedi nēbi comapenec tantiananosh,” quiosh. Aden aido bēdambo icmec mibi bēdamboshē iquec, Papa —quequin chianembi mibi. ⁴Mimbi aden bēdamboen naid Esus tantiaquido utsibo chuibeniombi. —Dadpeshun chieshēnaqui chieshtoenquo icquin Tesadonica yacnocquidon Esus tantiec —quequin shubu utsin shubu utsinquien chuibeniombi.

⁵Adec chieshtoenquo icquid icquin nuqui naden tantiec. —Ēbi chieshtomenquo icquid abitedishun

naid tantiaquidquo nec. Adquid icquin icsambo icquido cuidquin bēdambo icquido Nuquin Papan bēdamboen isec —quequin nuqui tantiec. Adec chieshtoenquo icquin Esus tantiasho Nuquin Papan: —Adquido ěmbi namiacnombo chomeshun ěbēdi tabadmendambi —nuqui caindac.

⁶Nuqui chieshēnquidon naidtsen tantiaquid icquin Nuquin Papan aido cuidendac. ⁷Aden nuqui chieshēnquido cuidquin aidon nuqui natiamiaid nuqui bēpiscudmendac. Abi yacnuēsh mayan bēdabo ambi comapenen tantiaquin namiaidobēd choshon Nuquin Ico Esusēn adoendac. ⁸—Icsaisambo yec matses cuidquid nebi —quequin tantiamenuec bēchamauanquiec choshon Nuquin Papa tantiesabo cuidendac. —“Nuquin Ico Esus tantiasho Nuquin Papan mibi bēdamboen istsiash,” quequin chuisho tantiatipimbo iquebi —quequin abi tantienquo icsho Esusēn cuidendac.

⁹Cacumiacximboen abi yacno puduedmenquo icquin ambi icsambo icquido cuidacno nidmendac cuentiapimbo icnuc. Adoac Esus abitedishun Ico yec bēdamboshē isadsho isec tabadtipimbo iquendac.

¹⁰Aden ambi icsaido cuidte ushēmbi Esus chosho abi tantiaquido: —Ēbi cuidmenquo icnuec abided cuidadaid Nuquin Ico bēdamboshē iquec —quequin aton Ico isec tabadendac.

Ëmbi Esus chuibanac aid
tantiabenondaído icquin mimbitsen
Esus chosho isendac.

¹¹—Aidbëdtambi Esus isendambi
—quequin mibi Nuquin Papa chianembi
naden. —Mimbi Esus tantiamiaído
Tesadonica yacnocquido bëdamboen
tabadme, Papa. Aído: “Esus tantiaquin
ambi chiapadomboen natiadquío
iquebi,” qesho ambi chiapadomboen
name, Papa. Comapenen tantiaquidquío
mibi neque. Adota, Papa. ¹²Aden mimbi
con Icbo Esuquidistubëdtan bëdambo
icmiac Esus tantiec bëdamboec
tabadtsiash, Papa. Adec bëdamboec
tabadsho isash utsibo mibi caic: “Abi
tantiaquid icsho Esusbëdtan Nuquin
Papan aden bëdamboen tabadmec. Aton
Icbo Esuquidistubëd Nuquin Papa
bëdamboshë iquec,” quependac utsibo,
Papa —quequin Nuquin Papa chianembi
mibi tantiaquin.

Icsamboshë icquidba chote chiaid

2 ¹Tantia, con utsibo. Mibitedi
chuinu. —Abi yacno tabadmenuen
buanuec Nuquin Papa yacnuësh Nuquin
Icbo Esus ënden choac —quesho
tantiash ²dacuëdtanenda. Mibi
yacnoshon çtsuntsin adec muaquin
chuiposh? Aidon: —Tantia. Nuquin
Papan Mayanën tantiamiacpadomboen
chuinu. Nuquin Icbo Esus ënden choac
—quec muapash. Ambembi chiaidien
chuichitash. —Naden Pabadon chiaid
iquec —quequin ëmbi dada
uaidbimboecquid isquimbien
chuichitash. ³Adec muaid tantiash:
—Abimboen cachitosh —quenda.
¿Nuquin Icbobada chopadic?
Padenquío. Utsibain choendac.
—Nuquin Papa caidën chiaid
tantiatiapimbo iquebi —quec matses
icsamboec tabadnubien Nuquin Papa
chieshënuquidquío icsamboshë icquidba

choash matses dadpenquío chuiquid
dapa iquendac. Aid Nuquin Papan
cuidtequidquío nendac. Aidba choabi
icnuc Esus choenquío iquendac.
Icsamboshë icquidbain choendac. ⁴Aid
chuiquid dapa yanashic Nuquin Papa
dëniacte bunquiec Nuquin Papa tabadte
shubu uashunaidën puduedshun:
—“Comapenen tantiaquin ëbi
nashunquidquío nec,” quequin mimbi
Nuquin Papa caid nibëdeque.
Ëbiuidtsëqui tantiata —caindac matses
abitedi chuiquin.

⁵Aden mibi chuideniondambi.
¿Tantienquioda ique? ⁶Nuquin Papan
tantiacpadënquío chomenuen uidënuac
icsamboshë icquid nëbi choenquío
iquec. Nuquin Papan tantiacpadënquío
choendac. Ëmbi chiondacpadquid abi
chomenquío icquid mimbi tantiec.
⁷Nëbi isadenquío icquidën Satanasën
namiac matsesën Nuquin Papan chiaid
niac-niacbededec. Padnuen icsamboshë
icquid choabi iquec. Aid chomenquío
icquid nidabi icnubi icsamboshë icquid
chuiquid dapa yantiapimbo iquendac.
Abi chomenquío icquid nidmiambien
⁸icsamboshë icquid matses chuiquid
dapa iquendac. Adnubien Nuquin Icbo
Esusën: —Ëbien matsesën Icbombo nec
—quequin matses abitedi tantiamenuec
choshon icsamboshë icquid: —Unësta
—caquinuidtsëqui unës uashunendac.

⁹Adec Esus choabi icnuc icsamboshë
icquid chuiquid dapa yanendac. Adquid
yanshumbic Satanasën
tantiamiacpadomboen comapenen
tantiaquin dadpenquío nabanquin
ismendac. —Comapenen tantiaquidquío
nebique. Istac —quequin ambembi
chiaid tantiamenuen aden nadatiambo
icquin nabanquin ismendac. ¹⁰Adec
icsauidequi tabadquid yec comapenec
muasho tantiash: —Abimbo caic
—quependac Esus tantiesabo Nuquin

Papan cuidtequido yec. Aidon Esus chuibenequidën Nuquin Papa yacno tabadte abimbo chuisho pamumëdadbimboen tantiatiapimbo icquin ambembi chiaiduidtsëqui tantiendac. ¹¹Aden ambi chiaid niac-niacuidequi icsho Nuquin Papan: —Abi bunaidquio ambembi chiaidquio chuisho ma tantiapanuna —quequin namiac: —Mue nec —quequin tantienquio iquendac. Utsi muasho tantiash badedi: —Abimbo chiec —quetsiash tantienquio yec. ¹²Aden ambi chiaidquio tantiatiapimbo icquin aid niac-niaquec icsateuidi bunsho Nuquin Papan cuidquiendac.

Nuquin Papan tantiamiaid

¹³Nuquin Icbon mibi tantiaquie. Ëndenquimboshë mases uabi Nuquin Papa nuqui caic: —Ëbi yacno tabadmenuen Esus tantiamequin aido bëdambo icmendambi —quepampic. Adshumbic aidën chiacpadomboen aton Mayanën namiac Nuquin Papan chiaidquio tantiash Esus tantiec mibi bëdamboec tabadcuenondac. —Adquiobidi iccosh —quesho tantiashun Nuquin Papa chianembi naden. —Aden aido bëdamboen namequid yec mibi bëdamboshë iquec, Papa —quequin chianembi mibi tantiaquin. ¹⁴Nuquin Papan chiaidquio ëmbi chuibanac mimbi Esus tantiabenondac. Abi yacnoshon Nuquin Icho Esuquidistupadquio bëdamboshë icmenuen aden Nuquin Papan mibi Esus tantiamiac. ¹⁵Ëbi adsho tantiashun ëmbi chiondacadpadomboen chieshtoenquio icquin Esus tantiata. Ëmbi mibi bëisquin chiondaidbëdta ëmbi dada uaquin abimbo chiondaid bëpiscudenda.

¹⁶Nuquin Icho Esuquidistubëdta Nuquin Papan nuqui tantiaquin bëdamboen isec. Adembidi: —Nuquin

Papa yacno Esusbëd iquendabi —quequin tantiamequin dayacquio yacimbocnuc nuqui icmec. ¹⁷Adquid icsho chianembi naden. —Tesadonica yacnocquido chieshtomenquio icquin Esus tantiamequin bëdamboec tabadquid icme, Papa. Adembidi bëdamboec chuinanquid icmequin nashunanquid icme, Papa —quequin Nuquin Papa chianembi mibi tantiaquin.

Nuquin Papa ëbi chianeta, quiaid

3 ¹Tantia, con utsibo. Mibi chuinu. Nuquin Papa ëbi chianeta. —Nidaid utsi-utsiec yacno nidmeshun Pabado chedo mases dadpenquio Esusën naid bëdamboen chuibame, Papa. Mimbi bëdamboen chuimiac ëmbi Esus tantibenondacadpadomboen utsibon dadpenshun Esus tantiabentsiash, Papa. ²Aden Esus chuibansho isun Esus tantiesabo chieshëmënnquidon: “Pabado cueschitono,” casho cuesmenda, Papa —quequin Nuquin Papa ëbi chianeta. ³Nuquin Icho bëdambo iquec. Muesambo icquin ambi chiacpadomboen nuqui bëdamboen dayun uaindac. —Ëbi tantienquio yanushe —queshun nuqui chieshtomenquio icquin Satanas nuqui yuametiapimbo iquendac. ⁴—Aden Nuquin Icbon bëdambo icmiac ëmbi chiacpadomboen naboedi adembidi Tesadonica yacnocquidon naindac —quequin tantiombi. ⁵Aden mibi tantiaquin naden Nuquin Papa chianembi: —Con Icho Esuquidistun tantiamiacpaden: “Nuquin Papan ëbi tantiaquie,” quequin Tesadonica yacnocquido tantiameta, Papa. Esusën chieshtoenquio icquin nacpadomboembidi aido chieshtoenquio icquid icmeta, Papa —quequin Nuquin Papa chianembi.

Esus tantiaquido uspuenquio icquid

⁶Tantia, con utsibo. Nuquin Icbo Esuquidistun: —Ëbi chuibeneta —caidquio icquin mibi chuinu. Esus tantiaquido utsi-utsiec ëmbi mibi chiondaid niac-niaquec chieshuidequi icsho isash aidbëd chieshec tabadenda. ⁷—“Ëbëd iquec Pabado dayacquio iccondacpadquiec chieshenquio yequien tabadtia,” quiosh —quiosh mibi caic. Abimbo mimbi cac. Mibëd yec dayacquio iccondabi. Chieshenquio yec chonoadteniondabi. ⁸Mimbi pete meniac ¿con piucquid mibi menenquiodambi ictionda? Bedquin mambi mibi menianepondac. —Ëbi meniac aton na naimëdnushe —quiash con piucquid bednuec chonoadteniondabi. ⁹—Esus tantiaquidon abi chuibanquid menenquio icquid —¿quectabi ique? Padenquio. Esusën naid chuibanquid ambi chuibanaidon meniaquien bëdambo ictsish. —Chieshenquio icquin ëmbi nacnensho isun ma adembidi Tesadonica yacnocquidontsen nanu —quiashini chonoadteniondac. ¹⁰Mibëd tabadquin naden chiondambi. —Aton na nacnenenquio yec chieshuidequi icsho pemenquio icquid —quequin chiondambi.

¹¹Mibi caic: —Utsi-utsiec chieshuidequi tabadosh. Utsi icsaiduidquio chiec

tabadosh —quetuidosh. ¹²Uspun tantia. Nuquin Icbo Esuquidistun chiaid mibi chuinu. Chieshuidequi tabadenda. Mitsanabi penuec chonoadta. ¹³Nuquin Papan chiacpadomben naic chieshtoenda. Chieshtoenquio icquin bëdamboen-uidi nata. ¹⁴Nëid dada uaquin ëmbi chiaid niac-niacsho ista. Adec icsasho isash: —“Icsamboen naombi,” quequin ma tantiabenu —quiash abëduidi iquenda. ¹⁵Aid chieshënenquio yequi adta. Mibipadquid Esus tantiaquid icsho naden chui. —Esus tantiaquid adesa ye. Padi. Bëdamboequien tabadtia —quequin chuita.

Pabadon ënquin chiaid

¹⁶Mibi tantiaquin Nuquin Papa chianembi naden. —Bëdambo icmianquidquio icquin Con Icbonquio ma aido dacuëdenquio icquid icmepanuna, Papa. Aidobëd ma Esus tëshëdenquio icpanuna, Papa —quequin Nuquin Papa chianembi. ¹⁷—Ista. Ëmbimbo dada uaid nëid neque —quequin ëmbi nëidtedpactsëc dada uaid isun: —Pabadon chiaidquio nec —quequin mimbi tantiendac. ¹⁸—Nuquin Icbo Esuquidistun bëdamboen ispashun —caimbi mibi. Padi. Aidtedi dada uaombi.